



# Gabinete de Comunicação e Relações Públicas

“Seja um bom cidadão, seja um novo herói para a nossa Nação”

## KOMUNIKADU IMPRENSA

Díli, 05 Janeiru 2015

### Aprovaun Unánimidade ba Orsamentu Jerál Estadu tinan 2015

Orsamentu Jerál Estadu tinan 2015 hetan aprovaun ho unânimidade husi membru Parlamentu Nasional nain neen-nulu resin lima (65) iha loron 18 Dezembru 2014, iha loron hirak molok tama ba Natal no semana rua molok tinan 2014 remata. Okaziaun ne'e sai nu'udar momentu histórico ida tan ba iha prosesu orsamental Timor-Leste nian, iha ne'ebé interesse nasional hatur ás-liu husi diferénsia política. Ida ne'e ba dala-tolu ona Opozisaun vota afavor ba Orsamentu Jeral Estadu.

Orsamentu Jerál Estadu tinan 2015, ne'ebé bazeia ba prinsípiu sustentabilidade fiskal, kapasidade ezekusaun no kapasidade abzorsaun ekonómiku, inklui kualidade orsamental, sei kontinua suporta política *front-loading* Governu nian hodi investe iha dezenvolvimentu rekursu umanu no projeitu infraestrutura ne'ebé prioritiza ona. Seitor rua ne'e sai nu'udar pilar fundamental ne'ebé sustenta kresmentu ekonómiku inkluzivu no sustentável, kriasaun kampu servisu, prestasaun servisu no seitor produtivu embrionariu Nasaun nian.

Governu kaer-metin nafatin ba promove partisipasaun sidadaun sira nian iha asuntu Estadu liu-husi forñese transmisau direita debate Orsamentu Estadu ba tinan 2015 iha televizaun no rádio ba povu iha teritóriu tomak. Ministériu Finansas, ne'ebé lidera husi ministra Emília Pires, akompaña prosesu tomak orsamentu nian, inklui partisipa iha diskusaun iha Komisaun Eventual Parlamentu Nasional nian, ne'ebé estabelese hodi koalia no tau iha konsiderasaun preokupasaun hotu-hotu ne'ebé membru Parlamentu sira hato'o liu-husi proposta alterasaun.

Total orsamentu aprovadu ba tinan 2015 hamutuk \$1,57 miloens dólares amerikanu. Husi montante ne'e, \$441 miloens aloka ba dezenvolvimentu infraestrutura bo'ot sira, enkuantu \$536 miloens tau-ba Beins no Servisus, ne'ebé inklui \$41 miloens ba Fundu Dezenvolvimentu Kapital Umanu hodi finansia bolsas estudus, formasaun profisionál no asisténsia téknika ba seitor judisial no ensinu superior.

Governu mós aloka \$406 miloens ba Transferénsia Pública hodi selu pensaun, subísidiu ba katuas-ferik, veteranus, famílias monoparentes, ki'ak, grupu vulnerável no seluk-seluk tan. Inkui mós iha montante ida ne'e verba ida ho montante \$81,9 miloens ba Autoridade Rejiaun Administrativa Espesial Oé-cusse Ambeno, modelu projeitu pilotu ba ekonomia sosial merkadu ida, ne'ebé lidera husi Dr. Mari Alkatiri, para halais dezenvolvimentu ekonómiku inkluzivu iha Oé-cusse. Valor orsamentu refere sei kontribui mos ba dezenvolvimentu infraestrutura báziku hodi estimula no promove investimentu iha rejiaun refere.

Fundu Petrolíferu sei kontinua dezenpeña papél importante iha política Governu nian ba iha prosesu dezenvolvimentu nasional. Notísia di'ak ida mai ita maka kuaze 70% husi Orsamentu Estadu tinan 2015 ne'e finansiadu husi retornu investimentu \$915 miloens no reseitas doméstikas \$170 miloens. Ida ne'e hatudu katak Timor-Leste hahú la'o ona iha dalan los ba atinji sustentabilidade fiskal - IKUS